

四庫全書

史部

欽定四庫全書

十六國春秋卷五

魏 崔鴻 撰

後秦錄

姚弋仲

姚弋仲南安赤亭羌人也其先有虞氏之苗裔昔夏禹封舜少子于西戎世為羌長其後燒當雄于洮罕之間當七世孫填虞九世孫遷郝率種人內附漢朝嘉

之假冠軍將軍羌校尉歸順王處之于赤亭郝玄孫柯  
為魏征西將軍綏戎校尉西羌都督柯生弋仲少而聰  
猛英果雄毅永嘉之亂戎夏襁負隨之者數萬自稱雍  
州刺史護羌校尉扶風公劉曜以弋仲為平西將軍石  
虎廢石弘自立弋仲稱疾不賀虎累召之乃赴太寧元  
年拜侍中征西大將軍石祗尊號于襄國以仲為右丞  
相石祗為劉顯所弑仲乃與燕連和有子四十二人常  
誡諸子曰我死之後汝歸晉家竭盡臣節乃使使降晉

晉永和七年拜仲使持節六夷大都督督江淮諸軍事儀同三司大單于封高陵郡公八年薨時年七十三後仲薨柩為苻生所得生以王禮葬之于天水萇稱尊號追諡景元皇帝廟號始祖陵曰高陵

姚襄

姚襄字景國弋仲第五子雄武多才藝能明察善撫納士民愛敬主咸請為嗣仲以襄非適不許石祗僭號以襄為使持節驃騎將軍護烏丸校尉晉遣使拜襄持節

平北將軍并州刺史即丘縣公弋仲薨率戶八萬南至  
滎陽晉處襄于譙城遣王弟為任單騎渡淮見豫州刺  
史謝尚一面交款便若平生揚州刺史殷浩憚其威名  
遣謝方討襄逆擊破之鼓行濟淮屯于盱眙朝廷大震  
襄方軌引北自稱大將軍大單于據許昌自許遂攻洛  
陽踰月不尅晉征西大將軍桓溫自江陵伐襄溫至伊  
水襄徹圍之為溫所敗襄奔還洛陽率數千騎奔于北  
山百姓隨襄者四千餘戶襄尋從北山將圍關中進屯

杏城將輔國將軍姚蘭畧地鄜城苻生遣苻飛龍拒戰  
率衆西引與苻堅戰于三原為堅所弑時年二十七  
苻尊號追謚魏武王

### 姚萇

姚萇字子茂弋仲之第二十四子少聰哲多權畧不修  
行業兄襄為苻堅所弑萇率諸弟降于苻生堅以萇為  
揚武將軍步兵校尉潞州之戰累有殊功遷左衛將軍  
累授幽州刺史苻堅伐晉以萇為龍驤將軍督益梁二

州諸軍事謂萇曰朕本以龍驤建業龍驤之號未曾假人今特以相授山南之事一以委卿堅左將軍竇衡進曰王者無戲言此將不祥之徵也堅默然白雀元年慕容泓起兵叛堅堅遣子叡討之以萇為司馬既而為泓所敗叡死之萇遣參軍姜協謝罪堅怒弑之萇懼奔于渭北歸者五萬餘家咸推萇為盟主自稱大將軍大單于萬年秦王大赦改元稱制行事二年六月慕容冲入長安司隸崔翼尚書趙遷等數百人來奔萇聞苻堅在

五將山遣驍騎吳忠率騎圍之萇自故縣如新平吳忠  
執堅送之萇將求禪代堅不許慕容冲遣率騎大將軍  
尚書令高蓋求戰于新平大破蓋率麾下數千人求降  
建初元年僭即皇帝位于長安大赦改年國號大秦改  
長安為常安追尊考弋仲為景元皇帝妣曰德皇后子  
興為皇太子秋七月萇如安定二年徙秦州三萬戶于  
安定八月以太子興鎮長安四年十月立社稷于長安  
六年大敗苻登于長安七年三月萇寢疾遣鎮東姚欣



德守長安召太子興詣行在所八年十月萇如長安至  
于新支堡疾篤輿疾而進十二月至長安召太尉姚弋  
僕射尹緯等受遺詔輔政萇曰吾氣力轉微將下能復  
臨天下卿等善相吾子謂興曰有毀此諸人者慎勿受  
之撫骨肉以仁接大臣以禮待物以信遇民以恩四者  
既備吾無恨矣庚子薨于永安宮年六十四謚武昭皇  
帝葬原陵廟號太祖

姚興

姚興字子畧萇之少子萇薨秘不發喪皇初元年乃發  
喪行服即位于槐里大赦改元七年如徑楊與苻登徙  
陰密三萬戶于長安二年以叔父緒為晉王征西將軍  
碩德為隴西王弟崇為齊公顯為常山公三年以緒為  
并冀二州牧鎮蒲坂四年二月遣齊公崇伐洛陽弘始  
元年九月大赦改元冬十月尅洛陽以東平紹為都督  
山東諸軍事豫州牧鎮洛陽四年五月遣大將軍隴西  
王碩德率步騎六萬伐呂隆於涼州先是吐蕃侮

內沒切

擅據西平沮渠蒙遜張掖李嵩據燉煌各制方城共相  
侵伐碩德從金城濟河直趣廣武逕蒼松至隆城下隆  
遣弟輔國超龍驤邈等率衆拒碩德碩德大破之生  
擒邈僭擅蒙孫李嵩等各修表奉獻九月隆奉表請降  
與答報嘉美以隆為鎮西將軍涼州刺史建康公十一  
月鳩摩羅什至長安七年正月興如逍遙園引諸沙門  
聽什說佛經九年以太子泓錄尚書事燕王慕容超遣  
使稱蕃十年與魏通和貢馬千匹十一年蜀譙縱遣使

稱蕃十六年五月興寢疾於內太子泓以兵屯東華門  
侍疾于諮議堂尚書廣平公弼潛謀為亂招集數千人  
持兵於第興疾損升前殿百官咸會征虜劉羗泣曰陛  
下寢疾數旬奈何忽有斯事興曰朕過庭無訓使諸子  
不穆愧于四海興以弼文武兼才未忍致法免其尚書  
令以公就第興怒乃收弼囚之十二月興疾甚遣收廣  
平公弼弟中甲杖納之武庫於是弼黨率甲士攻端門  
殿中上將軍斂曼高一作鬼勒兵拒戰不得人遂燒端門

興力疾臨前殿賜弼死丁未薨于殿年五十三謚文桓  
皇帝廟號高祖墓曰偶陵

姚泓

姚泓字元子興長子也孝友寬和而無經世之用又多  
疾病興將以為嗣而疑焉久之乃立為太子泓嘗受經  
博士淳于岐岐病泓親省疾拜于牀下自是公侯見師  
傳皆拜焉興如平涼留泓總後事馮翊人劉厥聚衆據  
萬年以叛泓遣鎮軍彭白狼率東宮禁兵討之斬厥赦

其餘黨興薨泓即位大赦改元為永和元年廬於諮議堂既薨乃親庶政內外百寮增位一級今文武各盡直言勿有所諱仇池公楊盛攻陷祁山遂逼秦川泓遣姚平救之盛引退姚嵩與平追盛及于竹領姚讚率隴西太守姚秦都畧陽太守王煥以禁兵赴之讚為盛所敗秦都王煥皆戰死讚至秦州退還仇池先是天水冀縣石鼓鳴聲聞數百里野雞皆雊秦州地震者三十二殷殷有聲者八山崩舍壞咸以為不祥及嵩將出羣僚固

諫不聽識者以為秦州泓之故鄉將滅之徵也赫連勃勃功陷陰密執秦州刺史姚軍都坑將士五千餘人進兵侵雍遂據抄掠鄆城姚紹及征虜尹昭鎮軍姚洽等率步騎五萬討之戰于馬鞍坂勃勃兵敗走還秦而晉相劉裕總大軍伐泓次于彭城遣檀道濟王鎮惡入自淮肥攻漆丘項城沈林子自汴入河攻倉垣泓將王苟生以漆丘降鎮惡除州刺史姚掌以項城降道濟晉師遂入潁口所至多降服姚紹聞晉師之至也馳還長安

言於泓曰晉師已過許昌豫州安定孤遠卒難救衛宜  
遷諸鎮戶內寶京畿可得精兵十萬足以橫行天下假  
使二寇交侵無能為也如其不爾晉侵豫州勃勃寇安  
定者將若之何吏部郎懿橫又以齊公姚恢有忠勲於  
國家未有殊賞今致之死地安定人人自危恐必生變  
宜徵還朝廷以慰其心泓並不從晉師至城皋征南姚  
泓時鎮洛陽部將趙玄說泓曰今寇逼已深百姓駭懼  
衆寡勢殊難以應敵宜攝諸戍兵士固守金墉以待京



師之援不可出戰如戰不捷大事去矣金墉既固師無損敗吳寇終不敢越金墉而西困之於堅城之下可以坐制其弊洸用姚禹閻恢之譖卒遣玄出戰會陽城城臬滎陽虎牢諸城悉皆降於道濟玄戰敗死於百谷道濟進至洛陽洸懼出降泓母弟懿嶮薄用其司馬孫暢謀欲襲長安誅姚紹廢泓而自立遂舉兵僭號傳檄州郡時征北姚恢亦率安定鎮戶三萬八千焚燒室宇以車為方陣自北雍州趨長安自稱大都督建義大將軍

移檄欲除君側之惡軍勢甚盛泓見內外離叛晉師漸逼歲旦朝羣臣于前殿悽然流涕羣臣皆泣姚紹率輕騎先赴難姚讚亦率諸軍還長安遂擊弒恢及其三子泓乃進紹太宰大將軍大都督中外諸軍事假黃鉞改封魯公率武衛姚鸞等距晉師于潼關道濟固壘不戰紹遣左長史姚洽等屯于河北欲絕道濟租輸為沈林子所敗衆皆沒焉紹忿恚發病嘔血而死泓遣使乞師于魏魏遣司徒南平公拔拔等進據河內為泓聲援劉裕

次于陝城泓使姚裕率步騎八千距之泓躬將大衆繼發裕為沈田子所敗泓退次于灊上姚讚距晉師于關西姚難屯于香城時大霖雨渭水汎溢王鎮惡水陸兼進追及姚難泓自灊上還軍次于石橋以援之晉師進據鄭城泓使姚裕尚書龐統屯兵官中姚洗屯于澧西尚書姚白瓜徙四軍雜戶入長安姚丕守渭橋胡翼度屯石積姚讚屯灊東泓軍于逍遙園鎮惡夾謂進兵破姚丕于渭橋泓自赴之逼水地狹因丕之敗遂相見而

退姚謨姚烈姚寶等皆死于陣泓單馬還宮鎮惡入自  
平朔門泓與姚裕數百騎出奔于石橋讚聞泓敗召將  
士告之皆以戈擊地攘袂大哭胡翼度奔衆奔晉讚夜  
率諸軍會泓于石橋晉師已固諸門讚軍不得入衆皆  
驚散泓計無所出謀欲降晉其子佛念年十二謂泓曰  
陛下今雖降晉劉裕待人無禮終必不全願自我決懽  
然不答遂登官牆自投而死平原公璞并州刺史尹昭以  
蒲坂降晉東平讚率宗室子弟百餘人亦降于裕裕盡

殺之九月裕至長安送泓于建康市而戮之時年三十建  
康百里之內草木焦死自姚萇白雀元年歲在甲申至  
于是歲在丙辰三十有三歲



十六國春秋卷五

欽定四庫全書

史部

別本十六國春秋卷十六

詳校官編修

臣

范來宗

侍讀

臣

孫球覆勘

總校官編修

臣

王燕緒

校對官編修

臣

莊通敏

謄錄監生

臣

許鳳舉

欽定四庫全書

十六國春秋卷六

蜀錄

李特

魏  
崔鴻  
撰

李特字玄休巴西宕渠人其先廩君之苗裔秦併天下  
以為黔中郡薄賦歛之中歲出錢四十巴人謂賦為實  
切藏宗因謂之實人焉及高祖為漢王始募實人平定三

秦既而不願出關求還鄉里高祖以其功復同豐沛更  
名其地為巴郡土有鹽鐵丹漆之利民用敦阜俗性剽  
勇善歌舞高祖愛其舞詔樂府習之今巴渝舞是也其  
後繁昌分為數十姓及魏武尅漢中特祖父虎將五百  
家歸魏魏武嘉之遷畧陽一云洛陽拜虎等為將軍徙內者  
亦萬餘家散居隴右諸郡及三輔弘農所在號巴氏虎  
子慕為東羌獵將慕生有五子輔特庠流驤特身長八  
尺雄武善騎射沉毅有大度元康中巴齊萬年反關西



擾亂天水洛陽扶國始平諸郡皆被兵頻歲大饑流移就穀相與入漢川者數萬家特至劔閣顧盼嶮阻曰劉禪有如此之地而面縛于人豈非庸才耶同移者閭武等咸歎異之初流民既至漢中上書求寄食巴蜀朝廷從之由是散在梁益不可禁止永康元年詔徵益州刺史趙廞為大長秋以成都內史耿騰代廞廞遂謀叛潛有劉氏割據之志騰率衆入內廞遣衆迎之戰于西門勝敗走廞獲殺之廞自稱大將軍益州牧特弟李庠與

兄弟及妹夫李舍任回等以四千騎歸獻獻以庠為臧  
寇將軍使斷北道庠素東羌之良將曉兵法部陣肅然  
獻惡其齊整殺之復以特為督將特兄弟既怨獻引兵  
歸縣竹獻恐朝廷疑已遣長史賈遠等督萬餘人斷北  
道次縣竹之石亭密收合得七千餘人夜襲遠軍遠軍  
大潰因放火燒之死者十八九進攻成都獻聞兵至驚  
怕不知所為李泌等夜斬關走文武盡散獻獨與妻子  
乘小船走至廣都為其下人朱竺所殺先是梁州刺史

羅尚聞嚴叛上表稱嚴非雄才又蜀人不願為亂事終無成願欲征之惠帝遣尚為平西將軍益州刺史率七千餘人入蜀特等聞尚來甚懼使其弟驤于道奉迎并貢寶物尚甚悅冬十月六郡流人推特行鎮北將軍承制封拜其弟流行鎮東將軍弟驤騎將軍少子雄為前將軍以相統領進兵攻尚于成都頗為特所敗乃阻長圍緣水作營自都安至犍為七百里與特相拒大安二年部下推特為大將軍大赦改元為建初元年益州從事任

回說尚曰特既凶逆侵暴百姓今又分散人衆在諸村堡驕急無備是天亡之時也何告諸村密刻期日內外擊之破之必矣尚從之遣大衆奄襲特營尚出逆戰到官桑特軍敗績死之雄稱成都王追謚景王及稱尊號追尊曰景皇帝廟號始祖

李流

李流字玄通特第四子也少好學便弓馬東羌校尉何攀稱流有貢育之勇舉為東羌校尉平趙慮于成都晉

朝論功拜奮威將軍封武陽侯建初元年特既見殺流  
自稱大將軍益州牧九月流疾篤謂諸將曰驍騎

李驤也

高明仁愛識量多奇固足以濟大事然前軍

李雄也

英武

始天所相可共受事於前軍以為成都王也遂薨年五  
十六諸將共立雄為主雄稱尊追謚流秦文王子龍嗣

### 李雄

李雄字仲雋特第三子母羅氏夢雙虹自門升天一虹  
中斷既而生焉後羅氏汲水忽然如寐夢大蛇繞其身

遂有孕十四月而生雄常言二子若有先亡在者必大貴蕩以李流世卒雄長八尺三寸美貌相工相之曰此君將貴其相有四目如重雲鼻如龜龍口方如器耳如相望法為大貴位過三公不疑雄少有烈氣有識者皆器重之特稱益州牧以雄鎮梓潼又拜前將軍流薨雄稱大將軍益州牧治郫城以西山范長生岩居穴處求道養志之士雄欲迎為君而臣之長生固辭曰推步大元五行大會甲子祚鍾于李非吾節也建興元年

十月雄即成都王位於南郊大赦改元約法七章以叔父  
驥為太傅兄虎威為太保晏平元年三月范長生乘素  
輿詣成都雄迎于大門執版延坐長生諸雄對坐即拜  
丞相尊曰范賢長生勸雄禪尊號夏六月僭即帝位大  
赦改元國號大成追尊父特為景帝母羅氏為太皇后  
十月加丞相范長生為天地大師之號封西山侯玉衡  
五年正月立妻任氏為皇后八年四月范長生卒以其  
子侍中賁為丞相長生善天文有術數民奉之如神十

四年立兄子班為太子二十四年五月雄寢疾六月丁卯薨年六十一諡武皇帝廟號太宗十月葬安都陵太子班襲位

李期

李期字世運雄第四子聰慧好學弱冠能屬文雄薨班即位雄子車騎將軍越自江陽奔喪以期與班非雄所生而嗣位心不平十月因夜哭臨越殺班於濱宮班字世文雄兄蕩第四子雄妻任氏無子養班為子越既殺



班于是矯太后令罪狀諡厲太子立期為主甲子期僭  
即皇帝位玉恒元年正月大赦改元立妻閭氏為后四  
月大將軍漢王壽率步騎一萬自涪向成都期不虞至  
預不設備至師剋城屯兵宮門殺相國建寧王越尚書令  
景騫尚書曰襄等廢期為印都縣公幽之別宮期自殺  
年二十五諡曰幽公

李壽

李壽字武考特季弟驤之少子少尚禮容敏而好學雄

奇其才器以為足荷重任封為建寧王雄薨期立改封  
漢王領梁州刺史治涪城壽見期兄弟千餘人并有強  
兵懼不自全陰謀據成都稱藩於晉乃誓文武得數千  
人襲成都尅之縱兵擄掠數日乃定僭即皇帝位於南  
郊大赦改咸康四年為漢興元年追尊父讓為獻皇帝  
三年六月壽下書曰吳會遺燼久逋天誅今將大興百  
萬躬行罰九月大閱軍士七萬餘人舟師泝江而上過  
成都鼓譟盈江壽登城觀之羣臣曰國小衆寡吳會險

遠圖之未易叩頭泣諫乃止其人咸稱萬歲十月講禮  
于太學舉明經者封好學侯四年以太子勢領大將軍  
錄尚書事六年分寧州乾石永昌雲南朱提越雋河陽  
六郡為漢州四月壽寢疾常見李期為祟八月薨年四  
十諡昭文皇帝廟號中宗葬安昌陵

### 李勢

李勢字子仁壽之長子身長七尺九寸腰帶十四圍善  
于俯仰時人異之壽既薨僭即帝位大赦改元太和元

年正月尊母閻氏為皇太后妻季氏為皇后嘉寧一年  
晉征西將軍荊州刺史桓溫來伐勢大發軍禦之鎮東  
李位都逆往降溫達成都之十里陌勢衆自潰三月溫  
至城下縱火燒其大城門勢衆惶懼無復固志勢乃夜  
開東門走九百里至晉壽然後送降文于溫勢尋與櫬  
面縛軍門溫解縛焚櫬送勢及叔父福載記云兄弟福等十餘  
人于建康晉封為歸義侯升平五年卒常璩字道將蜀  
成都人少好學著華陽國志十篇序開闢以來迄于李

勢皆有條理云宕渠古賔國今有賓城秦始皇時有長人長五丈見宕渠秦史胡毋敬曰五百年其地必有異人為大夫者及雄之稱尊號祖先出自宕渠有識者皆以為應之譙周云我死後三十年當有異人入蜀又著讖云廣漢城北有大賊曰流曰牧攻難得歲在亥宮自相尅又惠帝之世蜀童謠曰江橋頭闕下市成都北門十八字至是而應焉李特以晉永和元年歲在辛酉起兵至勢嘉寧二年晉永和三年歲在壬戌而降晉合四

十七年

十六國春秋卷六

欽定四庫全書

十六國春秋卷七

魏 崔鴻 撰

前涼錄

張軌

張軌字士彥安定烏氏人漢常山王耳十七世孫祖烈  
魏外黃令父溫太官令母隴西辛氏軌少好學明經與  
同郡皇甫士安友善拜太子舍人與京兆杜預以聽注

易遣之太康中為尚書郎太子洗馬中庶子遷散騎  
常侍征西將軍司馬軌以晉室多難陰圖保據河西追  
竇融故事筮之遇泰之觀軌喜曰霸者之兆乃求為涼  
州公卿亦舉軌拜涼州刺史課農桑拔賢才置崇文  
祭酒徵九郡胄子五百人立學校以教之永興二年拜  
西安將軍封樂鄉侯惠帝崩遣長史北宮純司馬纂別  
駕陰監奉表京師是歲大城姑臧其城本匈奴所築也  
南北七里東西三里地有龍形故名卧龍城永嘉四年



十一月黃龍出于臨羌河發水昇天身長十餘丈五年  
帝遣使拜車騎大將軍開府儀同三司策命未至而劉  
曜攻陷長安遷晉帝于平陽建興元年晉愍帝即位于  
長安遣使者拜軌鎮西大將軍開府儀同三司加侍中  
封西平郡公固讓不受三年進拜太尉涼州牧以軌年  
老多疾拜子晏行撫軍副涼州刺史五月軌寢疾京子  
晏為世子己丑薨于正寢年六十葬建陵冊贈侍中太  
尉諡武穆張祚僭號追尊武王廟號太宗

張寶

張寶字安遜軌之世子也學尚明察敬賢愛士晉舉秀才除尚書郎永嘉元年固辭驍騎將軍請還涼州帝許之改授議郎西中郎將建興元長史張璽等表寶嗣位十月帝遣使受西中郎將涼州刺史西平公二年十一月帝將降劉曜進寶侍中司空涼州牧三年始知劉曜逼遷天子平陽大臨三日五年南陽王寶聞愍帝崩自稱晉王年號建康置百官遣使拜寶征西大將軍開府

儀同三司增邑三千戶六年六月京兆人劉弘挾左道以眩惑百姓密與實左右十餘人謀殺實懷刀入內斬實于外寢時年五十葬寧陵晉王寶冊贈實大司馬涼州牧實元公張祚僭號追尊曰明王廟號高祖母弟茂嗣以實子幼嗣茂字成遜實之母弟虛靖好學不以勢利為心建興元年相國南陽王寶辟從事中郎又薦為給事黃門侍郎皆不就二年徵為侍中又以疾固辭四實拜秦州刺史加散騎常侍領雍州皆不受實左司馬

陰元年以實既被害子駿冲幼宜立長君乃推茂為大  
都督太尉涼州牧茂不從以平西將軍行都督涼州諸  
軍事護羌校尉涼州牧西平公大赦境內九月立實子  
駿為世子三年劉曜遣鴻臚拜茂太師涼王四年茂寢  
疾執駿手泣曰吾先人以孝友見稱自漢以來世執中  
順汝謹守忠節毋或失墮薨于正寢年四十八劉曜遣  
使贈太宰諡成烈王張祚僭號追尊曰成王廟號太宗

張駿

張駿字公庭實之世子永嘉元年生幼而奇偉十歲能屬文茂之四年拜使持節大都督大將軍涼州牧西平公大赦境內劉曜遣使拜大將軍涼州牧元年正月親耕藉田二月始承晉元帝崩問大臨三日四年十二月劉曜為賊所擒曜太子毗及劉胤等率衆奔上郢六年二月石勒稱天王遣使拜駿征西大將軍涼州牧加五錫之禮八年羣僚勸駿稱涼王置百官駿曰此非人臣所言敢有此言罪在不赦又請立世子乃立重華為

世子十二月鄩善王元禮獻女妹好號曰美人立賓遐  
觀以處之十四年五月雨雪降霜駿避正殿素服命羣  
寮極言得失十五年以右長史任處領國子祭酒立辟  
雍明堂而行禮焉命西曹掾集閣內外事付索綏以著  
涼春秋十一月以世子重華行涼州事十九年四子建  
西踰玉石縣九月改玉石縣為金澤縣二十一年始置  
百官官號皆擬天朝車服旌旂一如王者酒泉太守馬  
岌上言酒泉南山既崑崙之體周穆王見西王母樂而忘

歸即謂此山有石室玉堂珠璣鏤飾煥若神宮禹貢崑崙在臨江之西即此明矣宜立西王母祠以裨朝廷無疆之福駿從之二十二年六月薨于正德前殿年四十晉遣策贈大司馬諡忠成公七月葬大陵張祚僭號追尊文王廟號世祖

張重華

張重華子泰臨駿第二子寬和懿重沉毅少言駿薨右長史任處上華為使持節大都督太尉涼州牧護羌校

尉西平公假涼王大赦境內三年九月晉遣使者拜侍  
中大都督隴右諸軍事大將軍涼州刺史領護羌校尉  
西平公重華以位號未稱怒不受詔羣寮上重華為丞  
相涼王雍秦涼三州牧五年重華譙羣寮于間豫庭  
論講經義顧問索綏曰孔子婦誰家女老聃父字為何  
四皓既安太子住乎還山乎綏曰孔子婦姓开官氏老  
聃父名乾字元果胎別無耳一目不明孤單年七十二  
無妻與隣人益壽氏老女野合懷胎八十年乃生老子



四皓還否臣尚未悉重華曰卿不知乎四皓死于長安  
有四皓冢為不還山也七年十月重華寢疾臨春坊遣  
左長史馬岌策拜子靈曜為世子大赦境內十一月薨  
于平章殿年二十七葬顯陵張祚僭號追諡桓王廟號  
世祖

張祚

張祚字太伯駿之長庶子博學雄武有政治之才駿之  
二十一年拜延興太守封寧侯重華薨子靈曜嗣七

年十一月右長史趙長等矯稱遺令以祚為使持節都督中外諸軍事撫軍大將軍輔政十二月趙長等議以靈曜中幼世難未夷宜立長君廢曜為寧涼侯立祚為大將軍護羌校尉涼州牧趙長等議僭即王位于謙光殿大赦改元為和平元年立妻辛氏為皇后子太和為太子封弟天錫為長寧侯重華少子玄靖為涼武侯置百官二月尊祖父郊祀天地二年有神降于玄武殿自稱玄宴與人交語祚日夜祈之神言語利祚甚信

之征東張璠遣兵傳檄廢祚還第復立靈曜八月祚收  
權弟琚及其子嵩等驍騎將軍宋混兄脩素與祚有隙  
大懼祚疑之混西奔招合夷晉衆至萬餘人還向姑臧  
祚遣陽秋胡將靈曜于范拉音其其腰而殺之埋于沙坑  
九月宋混次于武始大澤為靈曜發哀閏月混至姑  
臧祚登神雀觀張琚張嵩殺祚守卒死者四百餘人斬  
西門關納混領軍趙長開宮門以應琚長馳入殿中大  
呼稱萬歲祚以長敗賊下觀勞之長奮梁音朔刺祚中額

奔入萬秋閣為廚士徐里所殺以庶人禮葬之天賜即位備禮改葬于愍陵追諡威王封子延堅為金澤侯

張玄靖

張玄靖字元安重華少子母郭夫人和平二年宋混張琚等上玄靖為大將軍涼州牧護羌校尉西平公時年七歲張瓊至姑臧推玄靖為大將軍涼王自為使持節都督中外諸軍事尚書令涼州牧張掖郡公四年五月東苑大冢上忽有災冬天澤池燃廣袤數丈執法御史

杜逸言于瓘曰此皆變之大者可就禳之瓘徵萬集于姑臧謀討朱氏混與弟澄及左右壯士楊和等四十餘騎奔入南門外令諸營曰張瓘得罪被太后詔誅之俄而衆至二千擁瓘率衆出戰混擊敗之衆悉去瓘自殺混入見玄靖以混為使持節中外都督諸軍事驃騎大將軍酒泉郡侯輔政五年六月大旱令諸祈雨之官詠雲漢詩儒林祭酒索綏曰雲漢陳周宣之美非旱之文昔神鼎之出漢虞丘不賀今辭與事違恐非致澤之意

也綏字士父燉煌人父戢為司徒綏家負好學舉孝廉為記室祭酒母喪去職後舉秀才著涼春秋五十卷又作六夷頌符命傳十餘篇以著述之功封平樂亭侯六年宋混卒天錫以使持節都督諸軍輔政八月右將軍齊南等議以靖多難務須立長君勸天錫自立閏月天錫遣肅等夜害玄靖時年十四葬平陵諡冲王

張天錫

張天錫字公純潁駿之少子母曰劉美人玄靖即位一

十八謁于太廟尊母劉氏為太后元年四月秦遣鴻臚  
回國拜天錫大將軍涼州牧西平公三年姑臧北山楊  
樹生松葉西苑北鹿生角東苑銅佛生毛延興地震陷  
裂水出天錫避正殿引咎責謝晉遣使拜右關中諸  
軍大將軍涼州牧西平公八年郡國火燃于泥中三十所  
苻堅復有魚并之規天錫大懼遣從事中郎韓博奉表  
于晉人與桓溫書尅其年大舉都會上邽十年以世子  
懷為使持節鎮西將軍高昌郡公次子大豫為世子豫

母焦氏為左夫人七月大水地震西平五十日中地十  
動土樓崩天錫疾美人閭姬薛姬皆自殺二姬因色竝  
有殊寵天錫每謂之曰汝二人將何以報我我死之後  
豈可更為人妻皆曰尊若不諱妾請効死于前灑掃于  
地下無他志十月天錫疾瘳大赦境內追悼二姬葬以  
夫人禮十三年五月苻堅遣武衛將軍句長等率衆來  
伐天錫遣中衛將軍史景等拒戰赤岸為秦所敗天錫  
納左長馬芮之言面縛降秦東徙長安拜歸義侯北部



尚書遷右僕射隨將堅敗于淮南又昔為員外散騎常  
待復本封薨贈鎮西將軍諡悼公張軌以晉永寧九月  
辛巳歲牧涼州至天錫敗亡之歲歲在丙午八主七十  
六年

十六國春秋卷七

欽定四庫全書

十六國春秋卷八

魏 崔鴻 撰

西涼錄

李暠

李暠字玄盛隴西狄道人也漢前將軍廣十六世孫廣子侍中敢之後李氏世為西州著姓祖父弇前涼武衛將軍天水郡太守安世亭侯父昶字中堅幼有令名世

子侍講年十八卒。嵩祖之遺腹子，少而好學，沈敏有器度。後涼龍飛二年，建康太守段業自稱涼州牧，號神璽元年，拜嵩為輔國令。二年，燉煌索仙等以嵩溫毅有惠政，推嵩為燉煌太守。段業復嵩鎮西將軍，領護西夷校尉。庚子元年十一月，晉昌太守唐瑤移檄六郡，推嵩為大將軍。涼公領秦涼二州牧，大赦改年，追尊祖弇、涼公父昶、涼簡公以瑤為征東將軍。二年正月，于南門起靜恭堂，以議朝政，圖讚自古聖帝明王、忠臣孝子、烈士貞女親

為序頌以作鑒戒五年正月立泮宮增高門學生四百  
人四月燉煌有葛緣木而生作黃鳥之形世子譚卒九  
月立第二子歆為世子正月大赦改年為建初元年三  
月讌于曲水命羣寮賦詩暲親為之叙文寫諸葛亮訓  
厲以戒諸子十三年正月寢疾顧命長史宗繇曰吾終  
之後嗣子猶卿子也善相輔導二月薨于恭德殿年六  
十葬建世陵諡昭武王廟號太祖初暲為羣雄所推定  
千里之地謂張氏之業不足成河西十郡歲月而一既

而傳檀入姑臧蒙遜基宇稍廣於是慨然著述志賦初  
河右不生楸槐張駿之世取秦隴植之皆死至是而酒  
泉言西北有槐生焉乃作槐樹賦又作婦辛氏誄自餘  
賦數十篇

李歆

李歆字士業高第二子高薨左長史宋繇等上為大將  
軍涼公領涼州牧護羌校尉大赦改年為嘉興元年七  
月歆聞蒙遜南伐西秦中外戒嚴將攻張掖尹太后以

為不可宋跡亦諫敵怒不從遂率步騎三萬東伐次于  
都瀆澗蒙遜自浩亶來戰于懷城敵敗左右勸還敵曰  
吾違太后明誨遠取敗辱不殺此胡復何面目以見母  
也勒衆復戰敗于蓼泉為遜所殺敵弟驍騎將軍翻擊  
虜將軍豫等西奔燉煌蒙遜遂入酒泉翻及燉煌太守  
恂與諸子等棄燉煌奔于北山郡人朱承張弘等以恂  
在郡有惠密信招恂恂率千騎入于燉煌朱承張弘等  
推恂為涼州刺史遜率衆二萬攻恂宋承等開門出降

恂自殺恂嵩之第六子也遜復翻子寶徙于姑臧歲餘  
北奔伊吾後二十餘年至魏太平三年寶至伊吾率流  
人反虜騎南襲燉煌據之遣使降魏魏以寶為使持節  
侍中都督西郵諸軍事鎮西大將軍開府儀同三司領  
護戎校尉沙州牧燉煌公承制玉門以西寶寬雅有度  
量甚著威惠于西土在燉煌三年徙并州刺史薨諡宣  
公自嵩元年歲在庚子至為蒙遜所滅二十一年

十六國春秋卷八



欽定四庫全書

十六國春秋卷九

魏 崔鴻 撰

北涼錄

沮渠蒙遜

沮渠蒙遜臨松盧水胡人其先世為匈奴左沮渠遂以  
官為氏遜好學涉羣史雄烈有英畧後龍飛二年遜伯  
父羅仇翹弼從呂光征河南光前軍大敗皆為光所

殺宗部會葬者萬餘人遜哭謂衆曰昔漢祚中微吾之  
乃祖翼獎實融保寧河在呂正耄荒虐民無道豈可坐  
觀成敗不上繼先祖安民之志下使二父有恨黃泉衆  
咸稱萬歲遂立盟約一旬之間衆至萬餘與從兄男成  
推光建康太守段業為涼州牧康公改龍飛二年為神  
璽元年業以遜為張掖太守男成為輔國大將軍委以  
軍國之任永安元年三月遜以為業所憚內不自安請  
為安西太守四月業牧男成賜死遜聞男成死泣告衆

曰男成忠于段公往見屠害諸軍能為執仇乎成素自  
恩信衆皆憤泣而從之北至氐池衆踰一萬業遣右將  
軍田昂武衛將軍梁中庸等攻侯塢遜自氐池附之昂  
率騎五百歸遜軍遂大潰中庸來奔五月遜至張掖田  
昂兄子承愛斬關納遜業左右散走遜大呼曰鎮西何  
在軍人曰在此業曰孤單飄一已為貴門所推可見乞  
餘命投身嶺南庶得東遷與妻子相見遜遂斬之六月  
右長史梁中庸等推遜為大將軍梁州牧大赦改元永

安四年秦鴻臚梁裴拜遜鎮西大將軍開府儀同三司  
沙州牧西海公九年二月兩月竝出正始元年冬十月  
遷都姑臧十月僭即河西王位于謙光殿大赦改元置  
百官始如吕光為三河王故事三年四月立子德政為  
世子三年二月與西秦通和遜西巡遂循海至鹽池祀  
王母等寺中有立石圖命中書侍郎張穆為賦銘于寺  
前十四年起遊林堂于內苑圖列古聖賢之像九月堂  
成遂讌羣臣論談經傳顧謂郎中劉炳曰仲尼何如人

也炳曰聖人也遜曰聖人者不疑滯于物而能與事推移畏于匡辱于陳伐樹削跡聖人固若是乎炳不能對遜曰卿知其外未知其內昔魯人有浮海而失津者至于亶州仲尼及七十二子遊於海中與魯人木杖令閉目乘之使歸告魯侯築城以備寇魯人出海投杖水中乃龍也其以狀告魯侯不信俄而有羣雁數萬銜土培城魯侯信之大城曲阜訖而齊寇至攻魯不尅而還此其所以稱聖也義和元年十二月魏遣太常李愼拜遜

太傅涼州牧涼王加九錫之禮三年夏四月遜寢疾立子茂虔為世子薨于路寢五月葬元陵謚武宣王廟號太祖然沮渠茂虔遜第三子聰穎好學和雅有度義和三年立為世子加中外都督大將軍錄尚書遜薨僭叩河西王位大赦改年為永和元年立子封疆為世子加撫軍大將軍錄尚書事三年五月酉中郎將燉煌太守沮渠唐兒上言曰十五日有一老父見于郡城東門投書忽然不見其書一紙八字滿之文曰涼王三十年若

七年度訪于奉常張慎曰昔號將亡神降于莘深願陛下克念修政以副三十年之慶若盤于遊田荒于酒色臣恐七年將有大變度不悅七年正月朝羣臣於謙光殿有狐在于東序門者不見其人左右以告搜之不獲二月端門崩初度為酒泉太守起浮屠于中街有石象在焉是月日流血五月太廟基陷六月當陽門崩魏常山王赤堅率衆至姑臧度嬰城拒守九月面縛出降魏釋其縛徙度反崇室士民十萬戶于平城拜度征西大

將軍王如故八年死賜諡哀王自遜永安元年歲在辛  
丑至是歲庚寅三十九載

十六國春秋卷九



欽定四庫全書

十六國春秋卷十

魏 崔鴻 撰

後涼錄

呂光

呂光字世明洛陽人其先自沛遷洛陽因家焉世為氏  
酋父婆樓字廣平佐命前秦官至太尉光以趙建武中  
生于枋頭夜有神光之異故名焉年十歲與諸兒童遊

戲邑里為戰陣之法童兒咸推為主而身長八尺四寸  
目重瞳子左肘有肉印穀凝沈重寬簡有大量人莫之  
知唯王猛異之曰此非常人言之苻堅舉賢良除美陽  
令民夷憚愛隣境肅清遷鷹揚將軍以功賜爵關內侯  
建元十九年以光為使持節都督西討諸軍事率將軍  
羌飛彭晃杜進康隆等率步騎七萬討西域十二月至  
龜茲王帛純捍命不降光軍其城南五里為一營深渠  
高壘廣設疑兵為木人被甲羅之壘上以為持久之計

二十年五月帛純乃傾國財寶請救于獯胡王遣弟唃  
龍侯將虓率騎二十餘萬救之胡便弓馬善矛槊鎧如  
連鑠射不可入乃以草索罽策馬擲人多有中者衆甚  
憚之姑默宿尉頭等國及諸胡內外七十萬人光遷營  
相接陣為勾鑠之法精騎為遊軍彌達其闕秋七月戰  
于城西大敗之帛純逃奔王侯降者三十餘國光入其  
城城有三重廣輪與長安城等城中塔廟千數帛純宮  
室壯麗煥若神居胡人奢侈富于生養家有蒲桃酒至

千斛經十年不敗士卒淪沒酒賦者相繼諸國貢款屬路立帛純弟震為王以安之光撫寧西域威恩甚著秦以光為使持節散騎常侍都督玉門已西諸軍事安西將軍西域校尉進封順鄉侯二十一年正月大饗文武博議進止衆咸請還光從之三月引還以馳二萬餘頭致外國珍異千餘品駿馬萬餘匹而還九月光入姑臧自領涼州刺史護西校尉太安元年苻丕以光為車騎大將軍梁州牧領護西域大都督酒泉公光始聞苻堅

為姚萇所轄奮袂哀怒三軍縞素大臨于城南傳檄諸  
州期孟冬大舉諡堅為文昭皇帝十月大赦境內改建  
元為太安十一月羣寮勸進曰長蛇未殄方掃國難宜  
進位元台十二月上光為侍中中外都督隴右諸軍大  
將軍梁州牧酒泉公三年八月甘露降逍遙園白鷺翔  
于酒泉衆驚成劉而從之麟嘉元年正月麟見金澤縣  
百獸從之于是羣寮奉表請崇進名號二月僭即王位  
于南郊大赦改元置官司丞郎以下猶攝州縣事三年

九月大廟新成追尊父為景昭王祖為宣公魯祖為恭  
公高祖為敬公龍飛元年五龍見于浩亶羣臣咸賀勸  
光稱號六月僭即天王位于南郊大赦改年備置羣司  
立世子紹為太子四年九月光寢疾十二月疾甚立太  
子紹為天王光自號太上皇帝以子纂為太尉弘為司  
徒詔曰吾疾病不濟吾終之後使纂統六軍弘管朝政  
汝恭已無為委重二兄庶可以濟今外有強寇民心未  
寧汝兄弟輯睦貽厥萬世若內相圖則禍不旋踵纂弘

泣曰不敢有二心薨葬高陵諡武皇帝廟號太祖

呂纂

呂纂字永緒光之長庶子母趙淑媛少便弓馬好書太  
安元年至于姑臧光臨薨執手戒之曰汝性麤武深為  
吾憂開基既難守成不易善輔永業勿聽讒言光薨紹  
祕不發喪纂排閣入哭盡哀而出紹懼以位讓之曰兄  
功高年長宜承大統纂曰臣雖長陛下國家之適不可  
以私愛而亂大倫驍騎呂超謂紹曰纂臨喪不哀步高

視遠觀其舉止恐成大變宜早除之纂聞超謀遂率壯士數百踰北城攻廣夏門入自青角門昇謙光殿紹登紫閣自殺呂超出奔廣武纂遂僭即天王位改龍飛四年為咸寧元年諡紹隱王纂遊出無慶荒耽酒色常與左右因醉馳獵于坑澗之閣殿中侍御史王回扣馬諫不納番采太守呂超擅伐鮮卑思盤思盤訴超于纂纂召超入朝怒曰卿恃兄弟桓桓欲欺吾也要當殺卿然後天下可定超頓首曰不敢纂引諸臣宴于內殿呂隆



屢勸纂酒已至昏醉乘步輦車將超等遊于內至琨華  
堂東閣超取劍擊纂纂下車擒超超刺纂洞胷奔于宣  
德堂將軍魏益入斬纂首以徇隆既篡位謚靈帝葬白  
石陵

呂隆

呂隆字永基光弟疊之子既殺纂遂僭即王位大赦氏  
咸平三年為神鼎元年二月追尊父寶為文皇帝超有  
佐命之勲拜為侍中都督中外諸軍事輔國大將軍錄

尚書封安定公二年秦遣鴻臚恒敦拜隆征北大將軍  
都督河西諸軍涼州牧建康公三年隆以三涼之逼遣  
齊玆寶請迎于秦遣尚書左僕射齊難率步騎四萬來  
迎隆率戶一萬隨難東遷既至長安秦以隆為散騎常  
侍尚書公如故超為安定太守其後坐與姚興少子廣  
川公弼謀反誅自光以乙酉歲據涼州至于是歲歲在  
癸卯凡一十九年

十六國春秋卷十

欽定四庫全書

十六國春秋卷十一

魏 崔鴻 撰

後燕錄

慕容垂

慕容垂字道明，號第五子小字阿六敦。母蘭淑儀垂少，有器度，長七尺七寸，手垂過膝，號甚寵之。常曰：「此兒濶達好奇，終能破人家，或能成人家。」故名霸。字道業，因墮

馬傷前二齒慕容儁即王位因改名缺外以慕容缺為  
名內惡而改之尋以讖記之文去决以垂為名及儁僭  
稱尊號封吳王建熙十年以車騎大將軍敗桓溫于枋  
頭威名大震太傅上庸王評深忌之垂遂出奔秦苻堅  
聞垂至大悅郊迎執手禮之甚重王猛惡垂雄畧勸堅  
殺之堅不從以為冠軍將軍封賓都侯歷京兆尹苻堅  
敗于淮南垂軍獨全堅以千餘騎奔之世子寶言于垂  
曰國家傾喪皇綱廢弛當隆中興之業建少康之功宜

恭承皇天之意因而取之垂曰彼悉心投命若何害之  
乃以兵屬堅垂至澠池言于堅曰王師不利北境之民  
或因此輕重請奉詔輯寧朔裔且龍鄴舊都陵廟所在  
乞過展拜以申罔極堅許之權翼諫曰垂爪牙名將今  
之韓白且世豪東夏志不為人下頗以避禍歸誠非慕  
德而至也恐冠軍之號不飽其志列地百里未滿其心  
且垂猶鷹也饑則附人飽便高颺遇風塵之會必有凌  
霄之志堅曰卿言是也但朕已許之匹夫猶重信況萬

乘之主乎翼曰陛下重小信而輕忽社稷臣見往不見其還關東之變垂其首乎自涼馬臺結草筏而渡至安陽修箋于長樂公丕垂至館之于鄴西會苻暉告丁零翟斌聚衆四千謀逼洛陽丕于是配垂兵三千遣廣武將軍苻飛龍率氐騎一千為垂之副丕戒飛龍曰垂為三軍之統卿為垂謀之主苻暉告急簡書捐尋垂方圖飛龍停河內不進悉誅氐兵命左右殺飛龍濟河焚橋衆三萬至洛陽苻暉閉關門拒守不與交通翟斌率衆

會垂勸稱尊號垂曰新興侯國之正統孤之君也若以諸軍之力得平關東當以大義喻秦奉迎反正誣上自尊非孤心也乃自稱大將軍燕王承制行事翟斌為建義將軍封河南王弟德為范陽王衆至二十萬濟自石門長驅攻鄴元年正月朝羣僚于清陽宮以暉在長安依晉愍帝在平陽中宗稱王改年建武故事改秦建元為燕元元年立太子寶為燕太子攻拔鄴都丕固守中城垂漸而圍之于魏郡肥鄉築新興以置輜重進師攻

鄴開其西奔之路二年三月丕棄鄴奔并州以魯陽王和為南中郎將鎮鄴十三年垂定都中山建興元年正月羣僚勸垂正尊號辛卯僭即皇帝位于南郊大赦改元建興立子寶為皇太子十年五月太子寶率衆八萬伐魏范陽王德為之後繼魏聞寶將至徙于河西寶臨河不敢濟引師還次子參合俄而魏軍大至三軍奔潰寶與德等數千騎奔免十一年三月垂大衆出參合太子寶出天門垂至參合見積骸如山設祭弔之死者父



兄各皆號哭軍哀慟垂慙憤嘔血因而寢疾築燕昌城而還寶等至雲中聞垂疾皆引歸及垂子平城夏四月薨于上谷之俎陽年七十二謚武成皇帝廟號世祖

### 慕容寶

慕容寶字道祐垂第四子元璽四年生于信都少輕果無志操好人從己段后諫垂曰太子資質雍容柔而不斷非濟世之雄遼西高陽陛下嗣之賢者宜擇一樹之垂不納謂曰汝謂我為晉獻公乎建興十一年四月僭

即皇帝位大赦改元為永康元年寶遣將軍趙王麟逼  
段后曰常謂主上不能嗣守大統今竟不能宜早自裁  
以全段氏后怒曰汝兄弟上逼殺母豈復能保守社稷  
吾豈惜死念國滅不久遂自殺八月立妃段氏為皇后  
濮陽公榮為皇太子二年正月魏使修和寶不許二月  
魏攻中山其夜尚書慕容皓謀殺寶立趙王麟寶與太  
子榮等萬騎就清河會于薊以開封公慕容詳守中山  
五月中山饑麟出據新市魏師戰于義臺敗績南奔魏

入中山寶遣御史中丞兼鴻臚魯遂持節受司空范陽  
王德丞相冀州牧丞制南夏封公封侯牧守三年二月  
寶發龍城以撫軍慕容騰為前軍步騎三萬將南伐次  
于乙連長上段速骨宋赤眉因民之憚遠役殺司空樂  
浪王宙衆既幸亂投仗奔走寶馳還龍城又與長樂王  
盛等南奔尚書蘭汗殺速骨等十餘人奉太子榮承制  
大赦遣迎寶還于薊寶欲北還盛等咸以汗忠欵虛實  
未明宜就范陽王德寶從之乃自薊而南四月寶至鄴

中遣民固請留之寶不從南至黎陽城西聞范陽王德  
稱制懼而退乃還龍城次于廣都蘭汗又遣左將軍蘇  
超寶具申欵誠忠節無差寶于是命發汗遣弟難率五  
百騎迎寶至龍城汗引寶入于外郎殺之年四十四殺  
太子榮及王公卿士百餘人汗自稱大將軍大單于昌  
黎王年號青龍七月長樂公盛襲誅汗盛即位偽謚寶  
惠愍皇帝廟號烈祖

慕容盛

慕容盛字道運寶之庶長子秦建元十年生於長安二  
十年苻堅誅慕容氏盛東奔既至垂問以西事畫地圖  
垂笑謂之曰昔魏武撫明帝之首遂乃侯之祖之愛孫  
有由來矣于是封長樂公建興六年領北中郎鎮薊進  
爵為王及寶為蘭汗所殺盛馳計哀因潛結大衆謀討  
難及汗等斬之建平元年七月告成宗廟大赦改元青  
龍諡揖自卑不稱尊號以長樂王稱制諸王貶爵為公  
東陽公慕容根等九十八人上尊號盛不許十月根等

又請盛許之丙子僭即皇帝位正月朝羣臣于承乾殿  
大赦改建平元年為長樂元年二年正月大赦盛去皇  
帝之號稱庶民天王三年八月右將軍慕容國謀率禁  
兵襲盛前將軍段機等因衆心阻動潛于禁中鼓譟大  
呼盛聞變率左右出戰衆皆披瀆俄有一賊從閣中擊  
傷足遂取輦昇前殿召叔公河間公熙囑以後事熙未  
至而薨年二十九偽謚昭武皇帝廟號中宗

慕容熙

慕容熙字道文一名長生垂之少子燕元二年生于長  
生建興八年封河間王永康初隨寶奔龍城拜司隸校  
尉長樂元年遷僕射中外都督領昌黎尹盛薨僭即皇  
帝位大赦改長樂三年為光始元年二年正月熙引見  
州郡耆舊予言問以民間疾苦司隸部民劉瓚對問稱  
旨拜帶方太守是春大治宮室至四月立苻貴人為昭  
儀五月築龍騰苑廣十里餘役徒二萬起景雲山子苑  
內又起逍遙宮甘露殿連房數百觀閣相交鑿天河渠

引水入宮又為符昭儀鑿曲光海青涼池季夏暑熱士卒不得休息渴死者大半四年二月昭儀符氏卒立符貴嬪為皇后九月符后遊畋熙從之北登白鹿山東過青嶺南臨滄海冬十一月乃還百姓苦之士卒為狼虎所害及凍死者五千餘人五年十月擬鄴之鳳陽作弘光門累級三層建始元年正月大赦天下三月太史丞梁延年夢月化為五白龍夢中占之曰月臣也龍君也月化為龍當有臣為君寤而告人曰國符其將盡乎是



月苻后起太華殿高承光一倍負土於北門土與穀同  
價典軍杜靜載棺指闕上書諫大怒斬之后嘗季夏思  
凍魚鱸冬須生地黃皆有司切責不得加以大辟四  
月苻后崩熙悲號蹕踊若喪考妣擁其尸而撫之曰體  
已就冷命遂斷矣于是僵仆絕息久而乃蘇服斬纊食  
粥百僚于宮內設立哭臨使有司按校哭者有淚以為  
忠孝無淚則加罪羣臣震懼莫不舍辛以為淚高陽王  
妃張氏熙之嫂也美姿容熙欲以為殉乃毀其襦韠中

有弊氈遂賜死三女叩頭求哀熙弗許營陵周輪數里  
下涓三泉內圖畫尚書八座之像熙曰善為之朕將隨  
后入此陵輜車高大毀北門而出中衛將軍馮跋左衛  
將軍張興先皆坐事亡奔以熙政之虐也與跋從兄萬  
泥等三十二人結盟推夕陽公慕容雲為主發尚方徒  
五千人分屯四門入宮授甲閉門拒守中黃門趙洛生  
奔告熙熙曰此鼠盜耳勝還當誅之乃收髮貫甲馳還  
赴難夜至龍城攻北門不尅遂入龍騰苑左右潰散熙

徵服逃于林中為人執送雲等殺之年三十二葬衡平陵謚曰昭文皇帝

### 慕容雲

慕容雲字子雨寶之養子祖父高和句麗之支庶自云高陽氏之苗裔故以高為氏寶之為太子雲以武藝給事東宮永康初拜侍御郎以疾去官及熙葬后馮跋詣之告以大謀雲懼跋等強之四月即天王位復姓高氏大赦改建始元年為正始元年國仍號大燕以馮跋為

侍中都督中外諸軍錄尚書事武邑公慕容歸為遼東  
公立燕之宗社三年冬十月雲臨東堂幸臣離班桃仁  
懷劍執紙而入稱有所啟抽劍擊雲雲以几拒班桃仁  
進而殺之立馮跋為主即位偽謚為忠懿皇帝始垂以  
丙戌之歲建號中山至馮跋之歲歲在己酉二十四年

十六國春秋卷十一

欽定四庫全書

十六國春秋卷十二

魏 崔鴻 撰

南涼錄

禿髮烏孤

禿髮烏孤河西鮮卑人也八世祖疋孤率其部自塞北遷於河西孤子壽圖立壽圖卒孫樹機能立壯果多謀畧秦始中殺秦州刺史胡烈於萬斛推敗涼州刺史蘇榆於

金山又殺涼州刺史楊欣於舟嶺盡有涼州之地武帝  
為之旰食能死從弟務丸代立丸死孫推斤立斤死子思  
復健立部衆轉盛遂據涼工健卒子烏孤襲位養民務修結  
鄰好呂光封烏孤廣武郡公益州牧左賢王太初元年正月改  
元自稱大將軍大單于西平生以弟鹿孤為驃騎將軍傳檀為  
車騎將軍二年改稱武威王三年正月徙於樂都八月孤因酒  
走馬馬倒傷脇笑曰幾使呂光父子大喜俄而患甚顧謂羣臣  
曰方難未靖宜立長君言終而薨在王位三年偽諡武王廟號

烈祖

利鹿孤

利鹿孤烏孤弟太初三年八月即位大赦改治西平建和元年正月大赦改年延耆老訪政二年羣臣固請即尊號不許九月僭稱河西王三年三月寢疾令曰昔我諸兄弟傳位非子者蓋以泰伯三讓周道以興故也武王創踐賓厯垂諸樊之試終能克昌家業者其在車騎乎吾寢疾協願是將不濟內外多虞國機務廣其令

車騎經愍百揆以成先王之志薨謚康王葬西平陵

傅檀

傅檀利鹿孤弟也少機警有才畧建和三年襲位僭號涼王遷於樂都改為弘昌元年秦遣使拜車騎將軍廣武公四年六月秦遣河右諸軍事涼州刺史鎮姑臧七月譙羣臣於宣德堂仰視而嘆曰古人言作者不居居者不信信矣前昌松太守孟禕進曰張文王築城苑繕宗廟構此堂為貽厥之資萬世之業秦師濟河忽然瓦解



此堂之建年垂百載十有二主唯信順可以久安仁義  
可以永固願大王勉之檀曰非子無以聞讜言也八月  
以鎮南大將軍文支鎮姑臧支遷於樂都雖受制於秦  
車服禮制一如王也十一日遷於姑臧嘉平元年十一  
月僭即涼王位於南郊大赦改年嘉平置百官立世子  
虎臺為太子二年正月以子明德歸南中郎將領昌松  
太守歸雋爽聰悟檀甚寵之年始十三命為昌高殿賦  
援筆即成影不移漏檀覽而喜之擢之曹子建七年僭

檀議欲征西乙弗孟愷諫曰連年不收上下饑弊南逼  
熾盤北道蒙遜今遠征雖尅後患必深偃檀曰孤將畧  
地卿無阻衆謂其太子虎臺曰今不種多年內外俱窘  
事宜西行以極此弊蒙遜近去不能卒來旦夕所慮唯  
在熾盤彼名微衆寡易以討禦吾不過一月自是同旋  
汝謹守樂都無使失墜偃檀乃率騎數千西襲乙弗大  
破之獲牛馬羊四十餘萬熾盤乘虛來襲旦而城潰安  
西樊泥自西平奔告偃檀謂衆曰今樂都為熾盤所陷

卿等能與吾籍乙弗之資取契汗以贖妻子者是所望也遂引師而西衆多逃返遣征北段苟進之苟亦不還於是將士皆散偃檀曰蒙遜熾盤昔皆委質於吾今而歸之不亦鄙乎四海之廣匹夫無容其身何其痛哉吾老矣寧見妻子而死遂歸熾盤六月至西平盤遣使郊迎以上賓之禮歲餘為熾盤所鳩謚景王時年五十一虎臺亦為熾盤所害少子保周歸魏魏以為張掖王自烏狐太初元年歲在丁酉至檀薨之歲十有八歲

十六國春秋卷十二

欽定四庫全書

十六國春秋卷十三

魏  
崔鴻  
撰

南燕錄

慕容德

慕容德字玄明，皝之少子。皝每對諸宮人言婦人妊，夢曰：入懷必生天子。公孫夫人方妊，夢曰：入臍中，獨喜而不敢言。晉咸康二年，晝寢，生德左右以告。方寢而起，皝曰：此兒易

生似鄭莊公長必有大德遂以德為名年十二而黜薨哀毀過禮年十八長八尺三寸額上有日角偃月重文元璽初封梁公建熙初進號安北將軍封范陽王入為魏尹秦滅燕徙於長安秦伐涼德請征自効後為張掖太守苻堅伐晉垂請德為副堅敗德乃隨垂如鄴垂稱燕王復封范陽王建興元年為司隸校尉八年司徒垂臨薨謂太子寶曰鄴是舊都宜委范陽王永康元年以德鎮鄴及寶失中山自龍城奔鄴以德為丞相領冀州牧承制南夏德兄子麟自義臺來奔因說

德曰中山既沒魏必乘勝攻鄴雖糧儲素積而城大難固且人情沮動不可以戰及魏軍未至擁衆南渡就魯陽王和據滑臺而聚兵積穀伺隙而動計之上也魏雖拔中山勢不久留不過驅掠而返人不樂從理自生變然後振威以援之魏則內外受敵使戀舊之士有所依憑廣開恩信招集遺黎可一舉而取之先是慕容和亦勸德南徙於是許之隆安元年正月德率戶四萬三千車二萬七千乘自鄴徙滑臺黎陽魏軍垂至三軍危懼

欲堡據黎陽昏日流澌水合是夜濟訖水亦尋消德大  
悅改黎陽津為天子津德入滑臺趙王麟等九十八人  
上言今中土傾陷龍都蕭條趙魏遺黎鵠企澤臯伏願  
仰承俯順以承宗廟謹上皇帝尊號德許之令曰假順  
來議且以燕元故事統符行帝制奏詔而已改永康三  
年為元年大赦殊死已下置百官封進有差寶自龍城  
南奔至黎陽城西數里伏於河西遣中黃門趙思告北  
地王鍾曰上去二月得丞相表即自南征段速骨作



逆於一連今失據來此呼丞相奏迎鍾馳使白狀竇遣  
思之後見採樵者知德稱帝懼而北奔初苻登既滅登  
弟廣率所部二十來降拜冠軍處之乞活堡至是復叛  
稱秦王德留撫軍曾陽王和守滑臺德率衆攻廣斬之  
和長史季辨殺和以滑臺降魏德曰苻廣雖平撫軍失  
據進有強敵退無所托計將安出尚書潘聰曰滑臺四  
通八達非帝王之居青齊沃壤號曰東秦地方二千里  
戶餘十萬四塞之固可謂用武之國德猶預未決於是

遣牙門蘇撫問沙門朗公報曰山西絕俗之士不應預  
聞朝議但有待之累非有託無以立陛下今來即朗之  
檀越破覽潘尚書之議可謂興邦之術矣撫又問以年  
世朗以周易筮之曰燕衰庚戌撫曰幾何曰年則一統  
世則及子撫曰何其促乎朗曰卦兆然也豈關人哉撫  
不敢言德大悅三月德引師而南五月次薛城八月入  
廣因即皇帝位於南郊大赦改元為建平元年又曰漢  
宣憫吏民犯諱故改名朕今增一備字以為復名庶開

臣子避諱之路於是叙賞有差新舊咸悅十月太極端  
門並就以公工張剛為材官將軍上方令二年十月徐  
州刺史潘聰青州刺史鞠仲來朝讌於延賢堂酒酣德  
笑謂羣臣曰朕雖寡薄恭己南面在上不驕夕惕於位  
可稱自古何等王也仲曰陛下中興之聖后少康光武  
之儔也顧命左右賜仲帛千匹仲疑多陳讓德曰卿知  
調朕朕不知戲卿乎卿飾對非實故亦虛言相賞賞不  
謬如何足謝也韓範進曰臣聞天子無戲言忠臣無妄

對今日之論可謂君臣俱失德大悅賜範絹五十匹三年三月德如齊城登營丘望見晏嬰塚顧左右曰禮大夫不通城墓平仲古之一賢人達者而生安近市死墓近城豈有意乎青州秀才晏謨對曰孔子稱臣先人平仲賢矣豈不知高其梁豐其禮蓋政在家門故儉以矯世存居湫隘卒豈擇地而墓乎所以不遠門者猶冀悟平生意也德悅之三月以太牢祀漢城陽景王廟遂北登社首山東望鼎足因目牛山問謨以齊之山川賢哲

故事謨歷對詳辨畫地成圖德深嘉之拜尚書郎五年  
二月夜地震在棲之雞皆驚攪飛散三月德疾動經旬  
幾於不振會前尚書右丞曹默自冀州來奔以白酒解  
之乃瘳以默為御史中丞封永熙侯五年正月兄子超  
自秦還九月汝水竭十一月得疾篤夢魘曰汝既無子  
何不早立超為太子不爾惡入生心戊午引見羣臣於  
東陽殿議立超為太子俄而震起百寮驚越德亦不安  
還宮疾甚呼段后公主及超申以後事執超手曰德若

至曉更見公卿顧託以汝死無所恨數目視公主欲有  
所言竟遂不能段后大言今召中書作詔立超可乎脩德開  
目領之是夕薨於顯安宮年七十為十餘棺夜分出四  
門潛瘞山谷莫知其屍所在虛墓於東陽陵謚獻武皇  
帝廟號世宗在位五年

慕容超

慕容超字祖明德兄北海王納之子秦滅燕以納為廣  
武太守數歲去官與母公孫太妃就弟德家於張掖德

從苻堅南征留金刀辭母而去及垂起兵山東張掖太守武昌誅納及德之諸子公孫太妃以老不合刑納妻段氏以懷妊未決執於郡獄獄掾呼延平德之故吏也將公孫及段氏逃於羌中而生超焉公孫氏臨卒授超金刀曰聞汝伯已興於鄴都吾朽病將沒相見理絕汝脫得東歸可以此刀還汝叔也後因呂隆歸秦徙涼州民於長安超因而東歸母謂超曰母子得全濟者呼延氏之力也惠而不報天不祐人乎今雖死吾欲為汝納

其女以答厚惠於是納之超至長安祥狂行乞由是往來無禁濟陰人宗正謙善卜相西至長安賣於路超行而遇之因就謙相謙竒其姿貌超乃內斷於心不告母妻辭母詣霸上乃與謙俱歸至諸關禁自稱張伏生二十日達梁父建平六年四月至廣固呈以金刀且宣祖母臨終之言德撫之號慟超身長八尺腰九圍姿器魁傑有類於德德愛之名之曰超封北海王拜侍中驃騎大將軍司隸校尉開府置佐十一年立為太子己未僭



即皇帝位太赦改建平六年為太上元年三年七月遣  
中書令韓範聘秦姚興許還超母妻八月奉使兼員外  
散騎常侍韋宗還聘贈以千金超復遣右僕射張華給  
事中宗正元聘奉送太樂伎一百二十人姚興大悅還  
超母妻十月華發長安宗正元馳先反命超悅遣征虜  
公孫五樓率騎二千迎於境上超親率六官迎於馬耳  
關四年正月大赦尊父北海穆王為穆皇帝母段氏為  
皇太后居長樂宮妻呼延氏為皇后五年二月晉相劉

裕率衆來伐三月晉師渡河超聞晉軍之盛自率衆四萬拒戰大敗奔還廣固徙郭內民入保小城晉攻陷大城長圍列守超請為藩臣以大峴為界裕不許六年正月超登天門朝羣臣於城上殺馬以饗將士文武皆有遷授二月尚書悅壽開門納晉師超出奔為晉師所執送建康市斬之時年二十六殺鮮卑王公以下三千餘人以男女萬餘口為軍賞始建平元年歲在己亥僭號居齊王為劉裕所滅在己酉年二十一年



十六國春秋卷十三

欽定四庫全書

十六國春秋卷十四

魏 崔鴻 撰

西秦錄

乞伏國仁

乞伏國仁隴西鮮卑人其先自漢北南出太陰山五世  
有祐鄰者晉太始初率戶五萬遷居高平川鄰卒子結  
權立遷於牽屯結權卒子利那立利那卒弟祁瑩立祁

湫卒利那子述延立遷於苑川述延卒祁湫子儋太寒立石勒之滅劉曜也懼而遷於麥田元孤山太寒卒子司繁立秦始皇中遷於度堅山建元七年秦將王統來伐繁率騎三萬拒統於苑川統潛襲度堅山部民五萬餘落悉降於統司繁乃詣統歸降苻堅拜南單于留之長安後以為鎮西將軍鎮勇士川甚有威惠之稱司繁卒國仁即位聞堅征晉奔敗國仁牧衆至十餘萬又聞堅為姚萇所殺於是自稱大都督大將軍大單于領秦

河二州牧改秦建元二十一年為建義元年置武陵苑  
川等十一郡築勇士都城以都之三年苻登遣使拜仁  
大將軍苑川王四年六月薨偽諡曰烈王廟號烈祖

乞伏乾歸

乞伏乾歸國仁弟雄武有度略仁薨羣寮以仁子公府  
幼稚乃立乾歸為將軍大單于河南王大赦改四年為  
初元年立邊氏為后以南川侯出連乞都為丞相九月  
遷於金城二年正月苻登遣使拜為大將軍金城王六

年立子熾盤為太子七年登遣使授左丞相河南王假  
黃鉞加九錫之禮十月氏王楊定步騎四萬來伐乾歸  
勒衆而進大敗定軍斬定及首級萬有七千於是盡有  
隴西之地十二月僭稱秦王大赦八年呂光來伐歸乃  
稱蕃遣子勃勃為質既而悔之十三年秦征西大將軍  
姚碩德率衆來伐入自南安峽歸次於隴西以拒碩德  
興潛師繼發乾歸聞兵將至率輕騎數千侯興俄與中  
軍相失為興追騎所逼戰敗遁歸苑川乃率騎數百馳



上允吾禿髮利鹿孤逆歸之於晉興乾歸將叛謀泄懼  
為利鹿孤所害謂其子熾盤曰姚興將盛吾將歸之今  
送汝兄弟及汝母為質於是送熾盤兄弟於西平乾歸  
遂奔長安姚興大悅拜持節都督河南諸軍事河州刺  
史歸義侯十四年遣乾歸還鎮苑川盡以部民配之十  
八年正月乾歸至長安十九年五月苑川地震裂正月  
又朝長安二十年姚興慮乾歸終為四州之患留拜上  
客尚書以其子熾盤為西夷校尉行河州刺史二十一

年熾盤以長安亂將始乃招結諸部築城於嶧琪山以據之更始元年乾歸隨姚興如平流熾盤攻抱罕尅之遂遣使來告乾歸乾歸奔還苑川遂如抱罕留熾盤鎮之乾歸將衆二萬遷於度堅山諸將勸稱王七月僭補秦王大赦改年置百官公卿以下皆復本位四年五月乾歸畋於五雞山有梟集於其手乾歸惡之六月為兄子公府所殺公府出奔熾盤遷於抱罕遣弟廣武將軍智達追擒公府於嶧嶺山南輟裂之八月葬乾歸於抱

罕陵仍偽謚武元王廟號高祖

乞伏熾盤

乞伏熾盤乾歸長子乾歸薨自稱大將軍河南王改元為永康元年以尚書令翟勒為相國封拜各有差二年熾盤討吐谷渾別統旁行長柳川掘達於渴渾川大破之俘獲男女二萬三千五年正月有五色雲起於南山盤大悅謂羣臣曰吾今年應有所定王業成矣於是繕甲整兵以伺四方之隙五月間僭檀西征率步騎二萬

襲樂都僭檀降遂并南涼兵強地廣十月僭即秦王位  
置百官立妻秃髮氏為王后四年熾盤子元基自長安  
逃歸拜尚書左僕射建弘元年立第二子慕末為太子  
領撫軍大將軍都督諸大軍事改元赦熾盤寢疾顧命太  
子慕末乃薨於外寢六月塋武平陵謚文昭王廟號太  
祖

乞伏慕末

乞伏慕末字安石熾盤之第二子幼而好學有文才建

弘元年立為太子熾盤薨僭即秦王位大赦改年為承  
弘元年二月立萬載為太子三年九月部民多叛慕末  
焚城邑毀寶器率戶五千東如封為赫連定所拒遂圍  
安南十一月魏遣尚書庫結率騎五千迎慕末衛軍吉  
毗固諫以為不宜遂下令止之庫結引還四年赫連定  
遣其叔北平公韋代率衆一萬攻南安城內大饑人相  
食傳侍中乞伏延祚吏部尚書乞伏跋跋踰城奔末乃  
銜璧出降送於上邦及宗族五百餘人悉為赫連所誅

自國仁建義元年乙酉歲至辛未四十七年

十六國春秋卷十四

欽定四庫全書

十六國春秋卷十五

魏 崔鴻 撰

北燕錄

馮跋

馮跋字文起長樂信都人其先畢萬之後也子孫食采馮鄉因以氏焉晉永嘉之亂祖父和避地上黨父安雄武有器量為慕容永將永滅跋東徙和龍家長谷中跋夜

夢天門開神光赫然燭於庭中永康未拜中衛將軍建  
始元年與二弟結謀襲殺慕容熙立高雲為主正始元  
年以跋為中外都督開府儀同三司錄尚書事封武邑  
公太平元年雲為其幸臣離班桃仁所殺帳下督張秦  
李桑誅班及仁羣臣推跋為主僭即天王位大赦令曰  
義貴適時不必改作故陳氏代姜不徙齊號即號燕國  
改為太平元年追尊祖和為元皇帝父安為宣帝子永  
為太子三年七月以太子永領大單于內置四輔七年



建太學以長樂劉軒營丘張熾成周翟崇為博士簡二千石以下子弟年十五以上教之十四年宿軍地燃一旬乃減十七年二月北部人趙壽女既嫁化為男娶妻而無子跋問諸羣臣曰此何祥尚書左承傳權對曰漢世雌鷄為雄陰變為陽君替臣僭之象卒有婦人專寵王莽篡位今女為男臣將無君之徵跋曰將何以禳之權曰桑穀生朝太戊修德而殷道中興熒惑守心宋景責躬延齡二紀唯修身崇善可以轉禍為福十八年八

月立子翼為太子跋戒之曰吾聞君人以學為本不學無以立尊敬師傅人倫之始汝其夙夜虔虔欽承明訓二十二年八月跋寢疾召中書監申秀侍中楊哲於內寢謂之曰吾患當不濟卿等善相吾子參決萬幾九月跋疾甚輦而臨軒命太子翼勒兵聽政以備非常宋夫人規立其子受惡翼聽政謂之曰上疾將瘳奈何便欲代父臨天下乎翼性仁弱遂還東宮一日三省疾宋夫人矯絕內外遣閹寺傳問而已翼及大臣皆不得見跋

弟弘於是與壯士數十人裹甲入禁中宿衛皆不戰而散宋夫人命閉東閣弘家僮庫斗頭勁捷有勇力踰閣而入至於皇堂射殺御女一人跣驚懼而薨弘遣修城告曰天降凶禍大行崩背太子不侍疾羣公不奔喪疑有逆謀圖危社稷吾備太弟之親遂攝大位以寧國家百官叩門入者進階二等太子翼率東宮兵出戰敗退兵皆奔散弘遣使賜死命宗正馮哲黃門盧招典墓事於東宮塋跋於長谷陵偽諡文成皇帝廟號太祖

馮弘

馮弘字文通跋之季弟高雲纂位拜中領軍封汲郡公  
太平元年拜尚書右僕射改封中山公遷尚書令司徒  
錄尚書事弘即天王位大興元年正月壬午朔大赦改  
年二月立夫人慕容氏為皇后二年正月立少子王仁  
為太子六月有鼠集城西盈數里地中西行至水前銜  
馬尾後者迭相銜尾而渡識者以為民遷之象七月魏  
師來伐神高八月召城邊東營丘城周四郡並降魏九

月魏師還弘徙民四萬餘戶而西三年六月魏永昌王  
來伐五年四月遣右衛孫德乞師於宋十二月又遣尚  
書楊伊請迎於句麗六年三月端門崩四月魏又遣侍  
中建興公虞弼東平公鵠青來攻尅白狼句麗將葛居  
孟先率衆數萬隨楊伊來迎屯於臨川尚書令郭生因  
民之憚遷開門而引魏軍魏軍疑而不赴生遂勒衆攻  
弘弘引句麗兵入自東門與生戰於闕下生中流矢卒  
句麗軍既入城取武庫甲以給其衆城內美女皆句麗

軍人所掠五月乙卯弘率龍城見戶東徙焚燒宮殿火  
一旬不絕令婦人被甲居中楊伊等勒精兵於外而居  
先率騎後殿方軌而進前後八十餘里魏兵追至遼水  
不擊而還遣使徵弘於句麗後二年為句麗所殺偽諡  
昭成皇帝自馮跋太平元年歲在乙酉至弘滅亡之歲  
丙子二十八載

十六國春秋卷十五

欽定四庫全書

十六國春秋卷十六

魏 崔鴻 撰

夏錄

赫連勃勃

赫連勃勃朔方人匈奴左賢王去卑之後劉元海之族也  
曾祖名武前趙嘉平中以宗室封樓煩公拜安北將軍  
下零中郎將祖豹子後趙建武中拜平北將軍左賢

王父衛辰苻堅以為西單于督攝河西諸虜屯於代來城因秦未定亂遂有朔方之地控弦之士三萬八千姚萇拜辰大將軍河西王大單于魏師來伐辰遣子力侯提率騎二萬拒戰河東為魏所敗遂乘勝濟河攻尅錢來執辰殺之勃勃辰第三子奔秦高平公沒奕干奕干妻之以女姚興以勃勃為持節安北將軍五原公配以三交五部鮮卑及雜虜二萬餘落鎮朔方時河西鮮卑杜崙獻馬八千匹於秦濟河至大城勃勃留之召其衆



二萬襲殺高平公沒奕千而並其衆衆至數萬自稱天  
王大單于大赦改元始十年為龍昇元年置百官以匈奴  
夏后氏之苗裔僭稱大夏以大兄右地代為丞相公  
發領北民夷十萬於朔方黑渠之界營起京城大赦改  
龍昇七年為鳳翔元年令曰朕之皇相北遷幽朔改姓  
如氏後從母為劉氏從母姓非禮也古之氏族無常王  
者繫天為子是為徽赫實與天連今改姓曰赫連氏庶  
協皇天之意庶非正統者以鐵伐為氏庶朕宗族子

孫剛銳如鐵皆堪伐人二年立夫人梁氏為后立子瑱  
為太子四年九月劉裕滅秦人於長安十二月裕留子  
義真鎮長安而還勃大悅遂圖進取之計遣太子瑱率  
騎二萬南伐長安五年義真遺龍驤將軍沈田子率衆  
逆戰瑱擊敗之退屯列迴堡八月勃勃進據咸陽劉裕  
大懼乃召義真東鎮洛陽勃勃入長安正月羣臣勸勃  
勃稱皇帝三月築壇於霸上即皇帝位大赦改鳳翔六  
年為冒武元年冬十月太子瑱領大將軍雍州牧錄南

臺尚書事鎮長安十一月勃勃還統萬

統萬勃勃所以都之城名也

宮殿大成赦其境內殊死以下改昌武二年為真興元年刻石都南頌紀功德四月追尊父衛辰曰桓皇帝廟號太祖母苻氏為皇太后祖父豹曰宣皇帝曾祖武曰景皇帝高祖訓芝曰元皇帝五月雨魚於統萬二年十月起沖天臺於統萬年山欲登之以望長安六年勃勃將廢太子瓚為秦王以酒泉公倫為太子瓚聞將廢已率衆七萬北伐倫倫率騎三萬拒之戰於平為瓚所敗倫死之

太原公昌率騎一萬襲殺璚率衆八萬五千歸於統萬  
勃大悅立昌為太子七月勃勃寢疾甚輦昇永安殿召  
羣臣囑以後事薨於永安殿年四十五諡武烈皇帝葬  
嘉平陵廟號世祖

赫連昌

赫連昌一名折勃勃之第三子身長八尺魁岸美姿貌  
勃勃薨即位於永安臺大赦改真興七年為永光元年  
七月查城劉睹川有青石大如馬頭浮在水上逆流而


行人見而送之十月魏乘虛來伐三年五月戰於黑渠  
為魏所敗昌與數千騎奔還魏追騎亦至昌留河內公費  
連烏提守高年徙諸城民七萬戶于安定以都之四年  
二月魏軍至安定攻城三月城潰昌奔秦州魏東平公  
鵠青追擒之送於魏魏封昌秦王尚始平公主為魏所  
殺

### 赫連定

赫連定勃勃第五子鳳翔二年封平原公雍州牧鎮長

安率衆赴安進封平原王大將軍領司徒昌為魏所擒  
定遂率遣衆數萬據平原僭稱皇帝大赦改承光四年  
為勝光元年進征南大將軍白蘭王吐谷渾莫漬為開  
府儀同三司河南王十月岐於陰盤登苛藍山而望統  
萬城泣曰先帝以朕承大業者豈有今日乎使天假朕  
年當與諸卿建王季之業既有狐羣百數鳴於定傍  
令射之無所獲定惡之曰此大不嘉咄咄天道復何言  
哉三年秋魏軍來襲十月尅安定進攻平原十一月定

遂掠民五萬戶西奔上邽四年河南王莫瓚因戎狄之  
衆東面以爭天下魏遣益州刺史深利延寧州刺史拾  
虎率騎三萬來伐遂擒定送於魏勅勅初號龍昇元年  
歲在丁未至是歲在辛未二十五年也



十六國春秋卷十六